

Renviar la discussiun ha provotgà in disput

Il cussegl grond n'è betg entrà en la revisiun da la lescha da personal

DAD ANDREAS CADONAU

■ Il cussegl grond è suandà la proposta da la maiorità da la cumissiun predeliberanta ed ha decidì da betg entrar en la revisiun totala da la lescha da personal. Quai s'enter ina discussiun intensiva e per part emozionala cun 60 encunter 57 vuschs.

Victoria e terrada na schain er en la politica betg lunsch in ord l'ater. Quai è sa mussà quest'emna en il cussegl grond. Vi da la fatscha da la cussegliera governativa, *Barbara Janom Steiner*, han ins pudì percorscher cuntentientscha la mesemna passada s'enter il sustegniment da deputadas e deputads per la legislaziun da la nova organisaziun regionala. Main cuntenta è la cussegliera governativa stada ier principalmain cun la fracziun da la pld en connex cun la fatschenta da la revisiun totala da la lescha da personal dal chantun. Ina fatschenta che ha provotgà discussiuns gia avant la sessiun dal parlament cun la decisiun da la cumissiun predeliberanta da betg entrar en la fatschenta. Sco ch'i para in absolut novum en la politica grischuna e la cussegliera governativa ha duvrà fermes plets per valitar la decisiun dad ina maiorità da la cumissiun. Ella ha fatg a savair avant deputadas e deputads dad esser consternada da la decisiun e numnà l'agir «refusa da discussiun».

Rinfatschà dad avoir refusà la lavur

La cussegliera governativa ha discurs dad in agir turpegius da la maiorità dals commembers da la cumissiun e dad avoir refusà la lavur. Barbara Ja-



Vincent Augustin (pcd Cuira) n'ha vulì savair nagut dad ina nova lescha da personal per il chantun Grischun.

FOTO Y. BÜRKL

nom Steiner ha explitgà avant il plenum la sesida da la cumissiun che haja cuzzà sulet duas uras e 15 minutas. Durant ina mesa ura haja ella explitgà ils puncts principals da la revisiun. Ina maiorità da la cumissiun n'haja betg

vulì discutir e saja vegnida a la sesida cun la ferma perschasiun da betg entrar en la materia. «In tal agir è nundescribibel e sgrischavel.» Barbara Janom Steiner è stada da l'avis che la revisiun saja giustifitgada e vers la fracziun da la

pld ha ella fatg attent che gist l'antecessur en ses uffizi e commember da la pld, *Martin Schmid*, haja lantschà la revisiun. Ina revisiun che naging haja mess en dumonda en la consultaziun. Barbara Janom Steiner è entrada sin la cri-

tica dad intginas deputadas ed intging deputads vers la revisiun, en spezial vers la pledadra da la maiorità da la cumissiun, *Angela Casanova* (pld Razén). Critica guvernamentala ha er il deputà e commember da cumissiun, *Vincent Augustin* (pcd Cuira) retschavì.

Ina proposta nunacceptabla

Vincent Augustin n'ha betg sulet renvià la critica da la cussegliera governativa. El ha defendì la libertad da la cumissiun da valitar la necessitad dad ina revisiun e da decider da betg entrar en la fatschenta. El ha explitgà avant il cussegl grond che quai haja da far in summa nagut cun renviar ina discussiun e n'haja da far nagut cun renviar la lavur. Vincent Augustin ha appellà a la cussegliera governativa da resguardar ils dretgs da deputadas e deputads. E da demussar respect avant las decisiuns. «Betg emblidai, vus essas giast en quel gremi.» Per Vincent Augustin è la proposta per ina revisiun da la lescha da personal ina lescha da «sepultura» ed ina lescha dad «autorisaziun» vers la regenza grischuna. El ha menziunà passa 65 alineas da la proposta stipuladas en la furma da surdar competenzas a la regenza. Vincent Augustin ha discurs d'ina schletta proposta cha saja da renviar. Il cussegl grond è suandà las resalvas da Vincent Augustin e da la maiorità da la cumissiun ed ha decidì da betg entrar en la fatschenta cun 60 encunter 57 vuschs. Sutterrà la revisiun totala da la lescha da personal ha la fracziun da la pld cun sustegn dad ina part da la pcd.